


Import da mangiativas e politica da provediment alimentar

■ L'import da martganzia d'impurtanza vitala che n'era betg avant maun u betg disponibla en quantidad suffizienta en las muntognas ha ina lunga tradiziun. En il temp roman imperial tempriv ed oravant tut en l'antica tardiva existivan stretgas colliaziuns cun l'Italia dal Nord. Dal prim tschientaner tardiv fin al terz tschientaner eran orientadas las vals al nord da las Alps sco era l'ulteriura Rezia occidentala pli ferm vers las provinzas romanas dal nordvest, quai ch'ins po deducir tranter auter da la Terra Sigillata (cheramica) importada. Las munaidas padanas scuvertas a Cunter (Surmeir) e la fina vaschella d'import chattada a Cuira documenteschan il commerzi cun l'Italia. Munaidas da divers tschientaners, tranter las qualas prevalan quellas da la Lumbardia e da la Germania dal Sid, dattan perditga da l'implicaziun da la Rezia en il barat da martganzia surregional creschent; l'uestg da Cuira possedeava bain in'atgna zecca che n'era dentant gia en il temp autmedieval betg pli abla da cuvrir tut il basegn da meds da pajament dal pajais. Il commerzi è sa sviluppà a moda parallela cun il transit da martganzia. Ultra da graun e vin ha il Grischun importà da tuts temp era sal. Era sche l'import da graun (oravant tut fument e seghel) na resguardava betg il princip da l'economia da subsistenza, prevaleva quella probablmain anc en turn il 1800. Cunquai ch'ils burgais da las Trais Lias pudevan agir libramain, vegniva barattà gia baud, oravant tut al sid da las Alps (Ligiaun, Tiraun e.a.) ed en il Vnuost, paintg e muvel sitg dal Grischun cunter mangiativas. Dasperas existiva era in commerzi professiunal. In veritabel commerzi a distanza cun materias primas e bains da consum pratitgavan oravant tut ils spediturs, per exempel ils Massners, Salis e Baviers. Pir l'augment da la dumonda da martganzia d'import, era d'artitgels da luxus sco café, tubac e zutger en il 18avel tschientaner ha fatg nascher veritablas chasas commerzialas (per exempel Rosenroll, Salis-Soglio) che operavan independentamain dal commerzi da spediziun. Entant ch'ils Grischuns èn sa provedids oravant tut sin il martgà turitgais fin en il temp modern tempriv, è sa spustà l'import da martganzia en consequenza da contracts politics sin la Lumbardia e la Svevia. Ils Capitulats da Milaun dal 1639, 1726 e 1763 èn s'effectuads a moda positiva sin ils pretschs d'import per ils Grischuns, cumbain che quel era contingentà. Ina politica da provediment cun controlla dal commerzi e cun provisiun obligatoria pratitgava atgnamain mo la citad da Cuira, en cas excepziun-



Il Capitulat da Milaun dal 1726 permetteva l'import da 1500 saumas graun libras da dazi.

nals era ils trais chaus-lia ch'han fatg cumprar graun oravant tut en cas da bloccadas d'import a custs da las Lias e scumandà l'export. Pir en il temp modern tempriv ha Milaun (per part ensem cun la Svevia) remplazzà Turitg respectivamain la Svevia temporarmain sco furniturs principals da graun. Il ris era oravant tut ina martganzia da transit. Il sal retiravan las Trais Lias dad Alla e da Reichenhall (Baviera), entant ch'il sal da mar venezian era, per motifs da qualitat, pauc dumandà. Il ris ed il tirc per la pulenta en probablmain sa derasads en Bergiaglia en il 16avel respectivamain 18avel tschientaner, cura che la cultivaziun aveva prendì ina dimensiun pli gronda en l'agricultura da l'Italia dal Nord. Mesiras legalas, controllas severas dals pretschs e vasts terrens en possess da famiglias dirigentas en las Terras subditas garantivan la controlla dal commerzi cun il vin-Vuclina.

Enturn il 1800 prevaleva anc l'economia chasana en confrunt cun l'economia da martgà en la plipart da las valladas grischunas. La construcziun da novas vias da traffic ha pussibilità en il 19avel tschientaner l'import da martganzia pli bunmartgada ch'ils products indigens. Tenor calculaziuns interprendidas a l'entschatta dal 19avel tschientaner occupava l'import da graun l'emprima piazza, suandà dal vin e vi-

nars, colonialas, textilias e rauba da pel; ina pli pitschna valita represchentava l'import da sal e da rauba da fier. A l'export da muvel da maz e d'allevament, oravant tut en la Svizra da l'Ost ed en l'Italia, s'opponiva l'import difficilmain calculabel da biestga d'allevament e da chavals da l'Allgäu, dal Tirol e dal Montafun. En consequenza da l'augment d'imports da graun da la Svizra Bassa, che produciva pli bunmartgà, ha la cultura d'ers (oravant tut seghel ed ierdi) pers si'impurtanza en il Grischun a partir dal 1850. L'agricultura da muntogna è crudada en ina profunda crisa, a la quala ins ha stuì far frunt cun emigrar u midar mastergn. Cunquai che l'industrialisaziun è stada marginala e la mecanisaziun rudimentara en il Grischun avant la Segunda Guerra mundiala, han predominà vinavant l'import da vivondas ed a partir da ca. l'onn 1890 era quel da bains da consum per ils hotels. En il Chantun sin via da sa modernisar han cuntanschì ils imports suenter il 1945, areguard la diversità, las quantitats e las valurs dals products, dimensiuns dal tutfatg novas. Studis specifics davart quest svilup modern mancan.

Adolf Collenberg

Politica da granezza

La politica da granezza cumpiglia generalmain mesiras prendidas per proveder la populaziun cun granezza. Il Stadi da

las Trais Lias preveseva ina politica da granezza impegnativa mo en cas d'ina miseria generala per garantir il provediment cun victualias. Il graun suttasteva dentant (sco il vin) quasi dapertut a la controlla dal commerzi e dals pretschs tras las autoritads, oravant tut per proteger ils paupers. En singuls cumins eri scumandà da vender ordaifer graun e grass senza il consentiment da las autoritads. Ina politica da provediment seriusa e permanenta, che cumpigliava la controlla dal commerzi ed ina reserva obligatoria, proseguiva mo la citad da Cuira, excepziunalmain era ils chaus-lia che laschavan cumprar, en cas da bloccadas d'import, granezza oravant tut a quint dal las Lias, scumandond l'export.

En il 16avel tschientaner possedeava il Grischun ina pli gronda surfatscha dad ers che pli tard. En l'Engiadina Bassa vegnivan cuntanschidas regularmain surproduziuns – en buns onns era en la Val dal Rain tranter Tusaun e Fläsch, en il Partenz Dadora ed en la Foppa che cuvernavan alura per ina buna part il basegn dal Grischun. La dependenza d'imports è dentant restada ed era, oravant tut en il 17avel tschientaner, fitg gronda en consequenza dals Scumbigls grischuns, da la pestilenza e da las bloccadas da graun da Milaun. En pli indebliva il mercenadi en massa l'agricultura (perdita da forzas da lavur). La gronda part dal graun d'import vegniva retratga da la fiera a Turitg, entant che quella da Com provediva oravant tut la Vuclina (ch'aveva consequentamain era da patir il pli fitg da las bloccadas da graun da Milaun). Sco martgadant a Turitg è attestà il 1528 in Luzi Tschanner. Occasiunalmain vegniva procurà graun a las fieras al Lai da Constanza, tranter auter ad Überlingen (oravant tut Cuira). Adina puspè vegnivi a plants da vart da Turitg e da la Confederaziun, perquai ch'ils martgadants grischuns, autorisads da cumprar graun per garantir l'autoprovediment en l'agen territori, vendevan vinavant quel a pretschs elevads en la Lumbardia. Il 1540 ed il 1569 ha la Dieta da las Lias stuì vegnir activa ed introducìr controllas ch'han dentant gi in effect modest, malgrà la smanatscha da chastis massivs. Envers las repetidas bloccadas da graun da Milaun cunter las Trais Lias han quellas reagì cun il scumond d'export da muvel e da products agriculs (chaschiel e.a.), dals quals existiva in grond basegn en la Lumbardia. Cumpras da vart da l'Austria èn documentadas mo darar avant il 18avel tschientaner. Il Capitulat da Milaun dal 1726 permetteva l'import da 1500 saumas graun da l'Austria libras da dazi, en substituziun a la fiera da Com – in regal «cun griflas» ch'ha expunì il Grischun a l'extorsion politica tras bloccadas da graun austriacas. Cun la mediaziun (1803) è la politica da granezza daventada in element da la politica d'economia dal chantun Grischun.

Adolf Collenberg

Commerzi da sal

Il commerzi da sal è stà ina fatschenta d'impurtanza vitala per il Grischun ch'ha da tuts temps stuì importar quest product. Ils trais centers commerzials che furnivan sal al Grischun eran Alla en il Tirol, Alla en Baviera e Vaniescha che furniva sal da mar. Il regal da sal imperial è passà da l'uestg e d'auters signurs feudals a las vischnancas da las Trais Lias che concessiunavan ils paucs commerziants da sal. Mintga vischin aveva il dretg da s'acquistar sal per l'agen basegn danunder ch'el voleva. Il sal mess en commerzi davent da Cuira era impurtant per il provediment dal Grischun dal Nord. Durant tscherts temps ha la citad da Cuira pratitgà quest commerzi da sal ad agen quint, per regla delegava ella dentant quel a commerziants, als quals vegniva prescrit la provisiun maximala sco era ina tscherta reserva. L'Austria profitava da


la dependenza da l'import da sal per far pressiu sin las Trais Lias. En tals cas s'offriva Vaniescha che pudeva pajar ina part da sias pensiuns en furma da sal da mar. Cun Alla en il Tirol existiva almain la pussaivladad da far affars en cuntrapart, grazia a las furniziuns da laina da l'Engiadina Bassa. Alura è la Republica helvetica sa patrunada dal monopol da sal ch'è passà il 1803 al chantun Grischun. Quel aveva stipulà contracts da furniziun cun l'exteriur, la distribuziun dal sal ha el dentant cedi cunter ina provisiun a la firma Massner & Braun da Cuira. L'Engiadina e las vals dal sid eran libras en lur provediment da sal, il 1841 ha dentant in tschert a Marca affittà per 7000 flurins il monopol da sal per il Mesauc. La taglia sin il sal era cumpraisa en il pretsch da cumpra e serviva a l'acquist da material da diever (per exempel d'armas il 1822). Questa taglia importava tschintg flurins per but, pia ca. 12 % dal pretsch da cumpra ch'era sa reduci successivamain grazia a las meglras relaziuns da transport. Il medem mument èn s'augmentads ils retgavs ch'importavan per exempel il 1805/06 9600 flurins ed il 1850 87 000 frs. Il 1856 ha il Chantun relaschà in reglament da sal ch'è restà en vigur fin il 1973: l'Uffizi da sal dal Grischun ha provedì tut las valladas grischunas cun sal da ses 25–30 magasins. En la lescha davart il provediment da sal dal 1961 ha il chantun Grischun confermà ses regal da sal, il 1975 ha el dentant ratifitgà la cunvegna interchantunala davart la vendita da sal ch'ha cedi l'execuziun dals regals chantunals da sal a la Verëinigte Schweizerische Rheinsalinen AG a Rheinfelden. Quest'interpresa incassa la taxa da regal, repartida als chantuns, tenor ina clav exacta e garantescha a la Svizra la provisiun ed il provediment da sal a pretschs unitars era per il sal importà. Il 1999 è resultà dal regal da sal in retgav da bundant in milliun francs, il dubel da quel budgetà.

Max Hilfiker

Hall (Alla)

Center dal commerzi da sal en il Tirol, impurtant da tuts temps per la provisiun da sal dal Grischun, tudestg Hall. En il 12avel tschientaner manavan ils berniers engiadinai, ultra da products indigens, era rauba da Milaun ad Alla per vender quella cunter sal e graun. Fin viaden il 19avel tschientaner èn vegnidas smeras grondas quantitats da laina en l'Engiadina Bassa per las salinas dad Alla. L'export da laina era economi-camain fitg impurtant per la regiun, ha dentant periclità ils gauds engiadinai. Il 1751 han ins importà ca. 780 t sal sin la Via imperiala: in terz per l'Engiadina Bassa, in terz per l'Engiadin'Ota, la Bergiaglia ed il Partenz ed in terz per Tavau. Ils Grischuns barattavan lur products da latg cunter sal ad Alla. Il 1513 ha l'imperatur Maximilian I ordinà da cular ils minerals da la Val S-charl ad Alla. Enturn il 1770 ha Peter Conradin Constantin von Planta da Zuoz elavurà in project per stabilir in monopol da sal e per construir ina largia via da commerzi da Clavenna a Danuder (cun colliaziun ad Alla). Ils Salis han dentant sabotà quest project. Suenter il 1803 ha il chantun Grischun surpiglià il monopol da sal. La chasa da commerzi Massner e Braun a Cuira era responsabla per la distribuziun.

Adolf Collenberg



La citad da Hall en il Tirol cun laina destinada per las salinas. (Maletg dal 1556).

Lexicon Istoric Retic

Il LIR cumpiglia bundant 3100 artigels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.